

VICEPRESIDENCIA

Crearán ata o 2010 dez novos centros para discapacitados

O vicepresidente da Xunta, Anxo Quintana, expuxo onte ao Real Padroado de Discapacidade a proposta galega para mellorar a rede de infraestruturas de atención a este colectivo. Quintana sinalou que o plan de equipamentos para atención a persoas con discapacidade intelectual suporá a creación de dez novos centros ata 2010.



MEDIO AMBIENTE

Vázquez confía en que "remate ben" o concurso eólico

Manuel Vázquez mostrou onte o seu desexo de que a resolución do concurso eólico "remate ben" e recoñeceu que a xornada de hoxe será un "día clave". "Non teño por que ter ningunha dúbida de que todos estamos a intentar que Galicia teña o mellor plan eólico", dixo antes de clausurar o I Encontro de Núcleos de Sustentabilidade Galegos.

CULTURA

Aberto o prazo para participar na primeira Mostra de Artesanía

Cultura abriu o prazo de inscrición da I Mostra de Artesanía de Galicia, cuxos preparativos están en marcha para que a comunidade sexa, durante tres días, punto de encontro de expresións culturais no que as técnicas artesanais se combinarán coas innovacións que chegan da man do deseño e das correntes artísticas.

LABORAL

A CIG denuncia que 2.000 marifeiros "rozan a escravitude"

O secretario nacional do sector do Mar da CIG, Xabier Aboi, denunciou a existencia de empresas que ofrecen traballadores estranxeiros -fundamentalmente de Indonesia- para cubrir postos de traballo no sector da pesca en condicións que "rozan a escravitude". O sindicalista estima que poderían ser ao redor de 2.000 os afectados.

Limitar as subvencións á produción de coches ecolóxicos "non axuda", di Ianni

O director de Citroën en Vigo pediu un "plan de urxencia" para reactivar as vendas

LV / Axencias

O director da factoría de PSA Peugeot Citroën en Vigo, Pierre Ianni, advertiu onte de que a intención da Administración de condicionar as subvencións ao sector á produción de coches eléctricos e sistemas de baixas emisións de CO₂, "non vai axudar moito" a esta industria.

Ianni realizou estas declaracións nunha comparecencia de prensa previa a unha reunión co Clúster de Empresas da Automoción de Galicia, para abordar a implantación do sistema de produción lean, e recordou que, na actualidade, "hai moi poucos coches que emitan menos de 140 gramos de CO₂". Así, apuntou que, no caso da fábrica viguesa, só unha versión de automóbil cumpre esta condición.

O director da planta de PSA Peugeot Citroën matizou que as axudas que está a deseñar o Ministerio de Industria refírense non só á produción de coches eléctricos, senón



Antonio Vega e Pierre Ianni, onte durante as segundas Xornadas do Lean. > AGN

a aqueles desenvolvementos ecolóxicos, como os híbridos, motores de baixa emisión de gases, etc.

No entanto, Pierre Ianni subliñou que "a solución" á crise do sector é "un plan de urxencia que reactive a compra de coches", para o que "é necesario que a xente teña posibilidade de préstamos fáciles e baratos".

"Hai que dar capacidade de compra a toda a xente, só así poderemos aumentar a produción", sinalou, á vez que precisou que un plan como o da Administración "non vai axudar moito".

Treves-Galicia dá o visto e prace ao ERE

Por unha ampla maioría, só tres votos en contra e dúas abstencións, o persoal de Treves-Galicia, empresa auxiliar de PSA-Citroën situada no polígono do Campiño (Pontevedra), deu o visto e prace aos últimos cambios acordados nas condicións do ERE temporal que a empresa expón para o ano 2009.

Fraga arránxao a medias

O presidente fundador do PP aclarou onte: "Eu non falei de colgar a ninguén, senón de ponderar o peso de nacionalismos"

LV / Axencias

O presidente fundador do PP, Manuel Fraga, atribuíu onte a polémica xurdida a raíz das súas declaracións sobre os partidos nacionalistas a unha "interpretación torcida", e subliñou que el non falou "de colgar a ninguén", senón de ponderar o peso dos nacionalistas no Parlamento.

En declaracións aos medios antes de asistir a unha conferencia de Anxo Quintana en Madrid, Fraga referíuse así ás críticas que recibiu polas afirmacións nas que sinalaba que habería que ponderar o peso dos partidos nacionalistas "colgándoos dalgún sitio".

"Eu non falei de colgar a ninguén, senón de sopesar... Preguntáronme como ponderar; ponderar é pesar; ben, pois dependerá de cómo se expresen as declaracións, iso é o que dixen", recalco o veterano político galego. E engadiu: "Se vostede tivese que contestar 50 preguntas en 50 minutos, gustaríame ver como saíría vostede...".

**Quintana desexaría unha rectificación clara do vilalbé**

O vicepresidente da Xunta, Anxo Quintana, dixo sobre as últimas declaracións de Fraga que sería mellor unha "rectificación clara e rotunda", aínda que valorou que asistise onte á súa conferencia no Fórum Nueva Economía en Madrid. Non puideron saudarse porque o vilalbé marchou antes de rematar o acto, "como é habitual nel". > Marta Peleteiro

Os docentes usan pouco as novas tecnoloxías pola falla de formación

LV / Axencias

Poucos profesores utilizan plenamente en Galicia a capacidade das novas tecnoloxías, máis por falta de formación que por dispoñibilidade de medios, indicou onte a catedrática de Ciencias da Educación da USC Lourdes Montero.

Segundo o equipo que coordina Montero e que levou a cabo varios estudos sobre a aplicación das tecnoloxías da información e a comunicación (TIC) en varios ámbitos do ensino público, nos últimos "tres a cinco anos" houbo "fortes investimentos" en computadores e en material informático.

Eses investimentos non foron acompañados de cambios en "políticas formativas, organizativas ou de apoio para facilitar o contexto de axuda", dixo. O resultado é que "o modelo educativo segue sendo frontal", de maneira que os profesores non axudan aos alumnos a construír o seu coñecemento.

frase

"O BNG VOTARÁ EN CONTRA DOS PGE OU SEGUIRÁ SENDO TAN SÓ UN PARVO ÚTIL AO SERVIZO DO PSOE?"

Ruiz Rivas (PP), a Quintana

**Feijoo quere manter un debate con Touriño**

Alberto Núñez Feijóo afirmou onte na TVG que non se debería "privar" os cidadáns galegos dun debate "entre as dúas persoas que temos posibilidades reais de presidir o próximo Goberno" da Xunta, en alusión a el e ao actual presidente, Pérez Touriño.